

# Pertemuan PM-Dr. M berita gembira buat seluruh ahli UMNO

Um-19/10/2006

KUALA LUMPUR 18 Okt. - Kesediaan Tun Dr. Mahathir Mohamad bertemu dengan Perdana Menteri, Datuk Seri Abdullah Ahmad Badawi disifatkan sebagai berita gembira untuk ahli-ahli UMNO di seluruh negara.

**Naib Presiden UMNO, Datuk Seri Mohd. Ali Rustam** menyifatkan pertemuan antara kedua-dua pemimpin itu sekiranya menjadi kenyataan merupakan suatu anugerah bagi rakyat dan negara dalam usaha menyelesaikan kekusutan hubungan antara kedua-dua tokoh itu.

Katanya, dengan semangat dan keberkatan bulan Ramadan serta sambutan Hari Raya Aidilfitri tidak lama lagi, pertemuan itu akan dapat menyelesaikan banyak perkara dan meredakan ketegangan hubungan mereka.

"Saya yakin dengan pertemuan hati ke hati, perkara yang menjadi kerisauan itu akan dapat diselesaikan," katanya kepada pemberita selepas berakhirnya Sidang Dewan Undangan Negeri di Melaka hari ini.

Mohd. Ali berkata demikian sebagai mengulas kenyataan Dr. Mahathir semalam yang dilaporkan bersetuju untuk bersemuka dengan Abdullah dalam tempoh terde-

kat bagi meredakan ketegangan hubungan mereka.

Pertemuan itu adalah susulan saranan Majlis Bekas Wakil Rakyat (Mubarak) kepada Dr. Mahathir baru-baru ini.

Bekas Perdana Menteri itu menyatakan persetujuannya mengadakan pertemuan tersebut sebelum sambutan Hari Raya Aidilfitri.

## Menyelesaikan

Dalam pada itu, **Ketua Penerangan UMNO, Tan Sri Muhammad Muhd. Taib** berkata, ahli-ahli UMNO sentiasa berharap kedua-dua pemimpin itu dapat bertemu untuk menyelesaikan konflik antara kedua-duanya.

Menurutnya, sejak Dr. Mahathir mengkritik kepimpinan Abdullah secara terbuka, ia sedikit sebanyak meletakkan ahli-ahli UMNO dalam dilema selain menyebabkan rakyat keliru.

"Saya yakin pertemuan ini merupakan satu platform terbaik bagi Dr. Mahathir untuk meluahkan rasa tidak puas hati kepada Perdana Menteri dalam beberapa isu.

Bagi Perdana Menteri pula, pertemuan ini dilihat sebagai satu peluang untuk beliau menjelaskan keputusan kerajaan yang sebelum ini dipertikaikan oleh Dr. Mahathir," katanya.

**Ahli Majlis Tertinggi UMNO, Datuk Shahrir Samad** berkata, secara prinsipnya setiap pertemuan mampu menghasilkan satu keputusan yang baik.

Bagaimanapun, katanya, ia bergantung kepada keinginan seseorang untuk mengatasi masalah yang berbangkit.

"Oleh itu besarlah harapan saya supaya pertemuan antara Datuk Seri (Abdullah) dan Tun (Dr. Mahathir) berjaya dan ia bukan satu pertemuan yang sia-sia," katanya.

Pertemuan itu turut dikongsi oleh **Menteri Besar Perak, Datuk Seri Mohd. Tajol Rosli Ghazali** yang mengangap ia dapat membuka hati dan menyelesaikan apa yang berlaku sebelum ini.

"Saya berharap pertemuan ini akan menjadi titik tolak untuk mewujudkan semula satu keluarga besar," katanya.

Bagi **Menteri Besar Kedah, Datuk Seri Mahdzir Khalid** pula, kesediaan Dr. Mahathir untuk bersemuka dengan Abdullah merupakan sesuatu yang amat dinantikan oleh rakyat Malaysia.

Menurut beliau, usaha Dr. Mahathir untuk bertemu dengan Perdana Menteri itu akan memberi impak yang positif kepada kekuatan UMNO dan perpaduan orang Melayu.

"Dengan cara ini, tidak ada pihak yang cuba mengambil kesempatan daripada kekeruhan yang timbul dan seterusnya mengugat perpaduan orang Melayu," katanya.

**Menteri Besar Terengganu, Datuk Seri Idris Jusoh** ketika mengulas cadangan pertemuan Abdullah-Dr. Mahathir yakin pertemuan itu dapat menyelesaikan segala kekeliruan dan perselisihan pendapat yang berlaku.

Dalam reaksinya, **Menteri Penerangan, Datuk Zainuddin Maidin** pula berkata, keputusan untuk bertemu Abdullah itu menunjukkan Dr. Mahathir memahami hasrat rakyat dan UMNO untuk melihat kedua-dua tokoh itu berdamai.

"Seluruh rakyat berharap pertemuan itu nanti akan mengeratkan semula ikatan silaturahim dan ia lebih bererti jika pertemuan itu diadakan pada bulan Ramadan.

"Pertemuan itu menunjukkan Dr. Mahathir tetap disanjung dan dihormati oleh seluruh rakyat, termasuklah barisan kepimpinan negara sekarang," katanya.